

Iluarsiissut

Saqqummiussissut 25. september 2024-meersoq taarserpaa
(Oqaatsini atorneqartuni iluarsiisoqarpoq.)

Uunga siunnersuut: Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaata allangortinnera pillugu Inatsisartut inatsisaat

(Silap pissusianik pissuteqartumik ajornartorsiornerni ajunaarnersuarnullu assingusuni pisuni aallarteqqinnissamut tapiissutisisinnaaneq, akiliutigineqartartut qaffanneri kiisalu qinnuteqarnermi piffissaliussat eqqunneqarneri)

(Aalisarnermut Piniarnermullu Naalakkersuisoq)

Saqqummiussissut

Siullermeerneqarnera

Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaata allangortinnera pillugu Inatsisartut inatsisaat Naalakkersuisut sinnerlugit saqqummiussinnaagakku qujavunga.

Allanguutissatut siunnersuut inatsisartut 2023-mi ukiakkut ataatsimiinnerminni UKA2023/62-imut tunngatillugu inuussutissarsiuteqartut aallarteqqinnissamut tapiiffigineqartarnerat pillugu inatsisip allanguutissaanik Naalakkersuisut suliaqaqqullugit aalajangiiiffissatut siunnersuummik akuersissuteqarsimaneriniq aallaaveqarpoq.

Siunnersuut aqqutigalugu aallarteqqinnissamut tapiiffigineqarsinnaaneq ajornannginnerulissaaq, tamatumalu saniatigut piumasaqaatit inatsimmi ilanngunneqarsimasut aqqutigalugit inatsit aqutsisunit aqukkuminarnerulissaaq innuttaasunillu atuisunit paasiuminarnerulerluni.

Inuussutissarsiutigisamut tunngatillugu inuussutissarsiuteqartut sillimatinik nalinginnaasutut isigisariaqartunik sillimmasersimanissaanik piumasaqaat sulit atuutsinneqarpoq. Taamaattoq inuit killilimmik isertitalit, taamaasillutillu sillimmasernissaminnut akissaqanngitsut, ajoqusersimatillutik aallartisarnissamut tapiiffigineqarsinnaanissaat allangortinnagu inatsisissatut siunnersuummi ilanngunneqaqqippoq. Inatsimmik aqutsinermi ammasumik ingerlatsisoqarnissaa aammalu piumasaqaatit tunngavigineqarnissaat qulakkeerniarlugu ukiut pingasut sioqqullugit ukiumut agguaqatigiissillugit 250.000 kr.-nik ikinnerusunilluunniit isertitaqarsimanissaaq peqatigisaanillu ukiut pingasut sioqqullugit agguaqatigiissillugit 100.000 kr.-nik ikinnerusunilluunniit nalilinnik pigisaqarnissaaq inatsimmi piumasaqaatigineqarpoq.

Aallarteqqinnissamut tapiissutigineqarsinnaasut annertunerpaamik 25.000 kr.-init 50.000 kr.-nut annertussuseqarnissaat siunnersuutigineqarpoq. Tapiissutigineqarsinnaasut qaffanneqarnissaat pisariaqarsimavoq aalisarnermi, piniarnermi nunalerinermilu atortut

akitsoriartorsimmamata ilutigisaanillu aalisarnerup ineriartornerata malitsigisaanik atortut pitsaasut akisunerusullu pisariaqartinneqaraluttuinnarmata.

Innuttaasut silaannaap pissusiata kingunerisaanik ajunaarnersuartut ittumik sakkortuunik eqqugaasut tapiiffigineqarsinnaalernissaanik siunnersuut ilaqarportaaq.

Pisut ajunaarnersuartut ittut tassaapput pisut annertuut tassanngaannartut siumullu naatsorsuutigineqarsinnaanngitsut. Pisut taamaattut inatsisini sillimatiniluunniit ilaanngimmata taamatut aalajangersaasoqarpoq.

Aallartisarnissamut inatsisimmi 2004-meersumi misilittakkat misilittakkallu allat paasinarsisippaat inuussutissarsiuteqartut inuussutissarsiutiminnik aallartitseqqipallassinnaanissaat anguniarlugu ajoqusernerit annaasaqarnerilluunniit ilaat taarsiiffigineqarnissaat eqqarsaatigalugit inatsimmi allassimasumik piffissaq qinnuteqarfissaq kingulleq ullulerneqartariaqartoq. Tamatuma malitsigisaanik atortut ajoqusersimanerinit annaasanullu tapiiffigineqarnissamik qinnuteqaatit atortut ajoquserneranit annaanerilluunniit kingusinnerpaamik ullut 30-t qaangiutsinnagit qinnuteqartoqartalissaaq. Qinnuteqarfissatut killiliusaaq pisunut uppersarneqarasuarsinnaasunut kisimi atuutsinneqarpoq, taamaasiornikkut inuussutissarsiuteqartup inuussutissarsiutiminik kinguarsarneqarpallaarani aallartitseqqinnissaa qulakkeerneqarsinnaassammat ilutigisaanillu atortunut pisariaqartinneqartunut tapiissutissat tunniunneqarasuarnissaat qulakkeerneqarluni.

Siunnersuutip tusarniutigineqarnerani Naalakkersuisut inuussutissarsiuteqartunit siunnersuutip ilusilersornerani peqataasimasunit siunnersuutitik atorneqarluarsinnaasunik pingaaruteqartunillu tigusaqartarsimapput.

Inatsisissatut siunnersuutip imarisaatalu kinguneqartitsilluartumik oqallisigineqarnissaa qilanaaraara.

Taamatut oqaaseqarlunga Naalakkersuisut sinnerlugit immikkoortoq inatsisartuni suliarisassanngortippara.